



00893

綠雲山房吟草

道光庚戌夏兄澄題

綠雲山房吟草
開卷看詩車藏板



綠雲山房詩草目錄

卷首



序文

卷上

古近體詩一百八十九首

戊戌至甲辰
并幼作

卷下

古近體詩一百九十七首

乙巳至丁未

卷終

題詞

後跋

綠雲山房詩草目錄

一



卷終

古近體詩一百八十九首

卷上

古近體詩一百八十九首

卷下

序文

卷首

綠雲山房詩草目錄

刻綠雲山房詩草序

補勤既刻詩存之明年出其手錄綠雲山房詩草而泣然曰是橐之藏以待梓也三十有二年適符女史有生之歲矣昔之雨夕花辰酒闌茶罷各登所作合製一編若將終身焉無何而鵲唳未已蝶夢遽醒鍼綫衣裳長局蓋篋遂成不忍卒讀之書所幸遺雛總角能誦母詩編輯鈹行意或期之若輩顧自乾嘉以來東南正始之選汗牛充棟美不勝收貂續琅嬛行遭焚劫甯遲之又久而什襲藏之原作千篇家書述事者去一閨閭言情者去一題重語複數見不鮮者又去一其登選也什二三湖海相隨滄桑幾歷名流詞翰題詠如雲不轉瞬而

綠雲山房詩草卷首

一

予年且周甲矣摘遺篇佳句遞授童孫又復朗然其能誦噫夫亦何待而不刻與會宦遊山左盡室偕來攜家藏初橐以至撥拭塵封追摹手澤因得逐加訂定重付鈔胄而仍責校刊於兒輩今而後可無悼乎斯人之不年矣或謂予詩刻始道光戊申其自丁未溯戊戌十年閒房中所作及悼亡專集宜必有附是橐以行者不知學與年進幼作豈容盡存存者聯和數章以紀當日情事意固不在詩也抑予因有感焉天若假女史以年多其見聞恣其材力俾與予相砥礪以至於今又安知其哀然成集不什伯於斯而學亦與年俱進與則信乎所詣止此所存亦止此爲可惜也顧卽今之所存其所詣

已如此詩凡二卷題序之帙半於詩多一時閨秀之作
中如勞氏蓮君蕤僊萊僊皆內家姊妹陶蘭卿何佩蘭
則吾家婦行亦當年盛事也今并刻之題曰綠雲山房
詩草蓋從其朔云時光緒戊寅上巳補勤主人識於歷
下四餘吟館

綠雲山房詩草卷首

二

序以年月先後爲次

仲夏陳君畫卿自唐昌歸遇余於城南草堂越日復來
袖其內子勞鏡香女史所著綠雲山房遺詩兩卷乞序
於余繙閱一過其骨雋而雅其氣靜以穆寄託遙深章
則穠麗絕羸浮躁率之氣有溫柔敦厚之風余所見閩
秀詩集不少根柢博贈才氣縱橫則推自然好學齋吐
屬風華詞旨爽朗則有聽秋軒他若如臬熊澹僊錢唐
吳蘋香歸安沈湘佩或結體簡古或選詞幽豔或取材
宏富尤爲近日女史之卓卓者集中諸作雖或未備其
長而一種清思逸韻已非此外各家所能及其中况多
思親懷遠之什纏綿悱惻情見乎詞則性情真摯獨得
綠雲山房詩草卷首 三

五七言之本原洵可誦也天或寬以歲月所詣更不止
此芳樹摧春紅蘭萎露惜哉晝卿逾期而哀謀所以壽
鏡香者無不至比之營奠營齋識度更相霄壤且其文
章詩古近爲吾邑冠實能爲泉下人增光桂子三秋杏
花十里直轉盼閒事耳老夫當拭目以俟爰爲之序而
歸之道光戊申七月雪舫鄔鶴徵書於吟秋樓時年七
十有五

序

披玉臺之新詠黛染千螺繹錦字之迴文絲抽獨繭絲
來才女壓倒鬚眉不數名流頓開胃府蓋天地之清淑
多鍾偉人而壑巖之秀靈閒生賢媛卽論淞水答松濤
者聆玉屑之譚近徵越風過梅市者峻瑤臺之望信乎
笄中獨步綽有林下神情也然而娥月重圓僊花一見
香名易播豔福難消潘騎省之悼亡悽展遺挂元才子
之營奠閒遣悲懷而手茲一編心乎百結證因緣於文
字藉報答乎平生此綠雲詩草之所由梓與女史勞氏
鏡香爲陳晝卿孝廉淑配其先著族東海徙家南湖女
史生而孝恭幼卽嫺雅謝公嬌女最小偏憐劉氏多才

綠雲山房詩草卷首

四

其文尤雋以故 尊翁又峯先生劇愛之而其伯兄佩
孫世講亦甚重之惟昔喬梓長征盼父兄之射策田荆
中折佐母氏以持門仲季遺孤筆硯課女紅之暇日晨
昏多豫悅巾披儒素之高風于焉蘭采陔南古香可撥
護專堂北新句斯酬秀才之名爭鬪於家術學士之譽
聿騰於士林矣 又峯翁與同郡 椒齋陳君爲同年
友麀榜通家識清聲於雛鳳雀屏選婿快豪氣之元龍
蓋晝卿孝廉亦文儗之雄師稽山之翹楚也金童玉女
戚黨榮其禮門竹筍練裳香簾勝以詩卷夕鐙紅而佐
讀刻竹雙聲晨鏡碧而催妝拈花疊韻時則 陳翁秉
鐸昌化晝卿下帷受經味爽而朝頌椒瑞於堂上公侯

之事擷蘋香於澗濱而地美湖山天生對偶性靈濬發
情文相生又况叔姒翩翩奇賞陶家弱質女兄嶽嶽才
優宋媛昭華瞻紅日於長安望白雲之親舍臨風遠道
步月清宵何可一日無詩那知百年似夢也乎嗟嗟梨
雲難駐鬢露易晞獲良友於閨中忽焉十稔檢遺文於
篋裏定有千秋載溯芳徽閒按軼事入門會賀乎祥女
括囊信符於吉人而紛綸五經幼旣嫺乎母教貫串諸
史才足纂其兄文正不獨秋水芙蓉玉泠泠乎詩骨春
風蘭芷珠纍纍乎賦心也是則奉倩神傷挹香鑪之餘
潤義山悵悒思錦瑟之華年情之所鍾問誰能遣哉晝
卿爰哀其詩鈔若干卷委屬弁語敢對危言僕於兩家

綠雲山房詩草卷首

五

交忝三世陳補闕久推名宿勞山亭故多女眞紅杏村
枝望夫君奏眾僊同日之曲綠雲春樹眷老友懷吉甫
清風之吟道光三十年歲次庚戌春正月下澣同里尺
莊老人杜煦拜撰

序

道性情一語爲千古言詩之則厥後曰格律曰宗派曰風氣言詩者愈精且備去詩也愈遠且失甚則若禁體然謂閨秀詩不可有脂粉氣方外詩不可有蔬筍氣夫必不脂粉而後爲閨秀不蔬筍而後爲方外詩或佳矣能得其性情之故耶鏡香余季妹也余妹三皆能詩鏡香突過其兩姊雖然余初不知其能詩也道光己丑鏡香尙垂髫余報罷禮部試遂旅食京邑三五年中家大人亦北上余兩弟不幸早世凡往來書啟半出鏡香手洋洋千百言敘瑣事能委曲詳覈始乃奇之已而附來吟稟婉約如其人然後知其能詩也歲戊戌鏡香年

綠雲山房詩草卷首

六

二十有三歸畫卿偕隨侍唐昌學署唐昌於紹郡雖不及四百里遠而山谿多沮每思歸甯而不得輒抑鬱而宣於詩壬寅癸卯間海氛尙熾家大人命舉家來京鏡香因親老遠離愈感戀其爲詩也近商音竊訝以爲不祥畫卿亦嘗以善憂憂之丙午春寄余三十自壽詩并書曰今而知筆墨非婦人事箕帚井臼凡職所當任者從此益努力余答之曰若是覺左芬太華而桓少君又太樸矣初不料其逾年後遽一病歿也於戲手足慘傷至於此極能不痛哉鏡香自幼於兄嫂姊弟無纖微失長而族黨中胥敬愛之輒引以爲法則性情之端淑可知家雖貧無斯飢之歎追逋每集於庭而吟誦不廢

於室則性情之曠逸可知又甚孝而多慧佐 老母理
家政餘爲安排書冊飲具棊局巧合意旨故亦特承憐
愛及今赴之來也誠家人祕勿發而 老人尙於燈前
聚話歷數其少長時事或卜音問噫不更令人愴絕乎
鏡香旣歿畫卿將輯其遺藁付梓而問序於余余未獲
見鏡香全藁且雅不以言詩者之言爲知言也胡序焉
及庚戌之春畫卿計偕北上道出定武以全藁示余且
曰鏡香方于歸時盡火其藁而來不欲以詩見此藁自
戊戌至於丁未並附以幼時所作而未火者選擇得若
千首急於待梓固請作序余不能辭乃忍淚卒覽益愴
然於鏡香之性情以閱歷而著鏡香之閱歷以景物而

綠雲山房詩草卷首

七

傳其詩卽自序其人也固無俟乎人之序之也特恐梓
行後人猶斷斷然格律其詩宗派其詩風氣其詩甚而
至於脂粉其詩余將無從置辨特就其生平所以爲詩
者以爲之序可乎畫卿諾遂書於簡首適李氏妹紉香
名蘭君年逾三十而亡周氏妹瓣香名蓮君年未四十
而寡鏡香名蓉君年止三十有二幸皆有一子道光庚
戌四月兄沅恩筆於定武署齋

序

浙西山水之勝自餘杭臨安二百里而上至於唐昌蔚
然有深秀之氣先夫子少司空梅梁公未第時秉鐸是
邑子偕往居歲餘顧而樂之老寓燕臺思問訊舊遊山
水不可得歲己酉先夫子門生文小雲通政典試兩浙
所取士陳晝卿爲子弟廉叔同年友知其尊翁亦秉鐸
唐昌召而見之與言昔時都人士今皆其子若孫矣榮
落不同而山水之勝如故爲悲喜交集者久之已而晝
卿袖其夫人勞鏡香遺橐出示予閱之則皆隨任唐昌
時作也女子善懷多憶別思親之什往往託雲山風景
以傳之寺若治平菴若紫雲山若南屏皆予數十年前

綠雲山房詩草卷首

八

遊詠所經者讀鏡香詩一一如睹且愧予向之不文而
孤佳山水多也鏡香爲吾鄉勞佩蓀孝廉妹子久耳其
名恨不一見適晝卿十年卒以病已於唐昌官舍天或
者以鏡香鳴山水之盛耶抑假山水以工其詩耶惜假
之地而不假之年爲可慨也晝卿旣悼亡手錄其詩請
序於予予衰且病筆墨荒落已謝不能顧以誌舊遊之
感也書數行歸之咸豐壬子冬奉賢女史袁鏡蓉書於
京邸月葉軒時年七十有九

序

子與勞佩蓀幼同里閨卽知其女弟多詩才論者方之劉家三妹然未及睹其所作也家大人秉鐸昌化之二年陳俶齋世伯共涖斯邑長君晝卿髫年英敏隨任受經已而迎佳儷來則佩蓀季妹鏡香女史也女史少負詩名而不欲以詩見方于歸時盡火其橐而來晝卿高才卓犖雅善賦詩琴瑟音諧復事緇帙花晨月夕疊詠聯吟滴粉搓酥傳爲韻事晝卿由是益力於詩名大噪應試輒冠其曹賢季治卿茂才亦得淑偶紅閨聯和棣萼輝映風雅一門而詩必以女史爲最女史性情眞摯才識聰雋博通經史諸大家不沾沾於綺麗駢偶之

綠雲山房詩草卷首

九

學其懷古諸作卓具史識有丈夫風至於刻鏤物態摹繪時景細膩瀏亮不求精緻而雅鍊天然顧其性工愁且多病以母氏北上益感慕不釋吐屬悽婉漸近商音集中吟花聽雨述夢寫懷及呈寄父兄姊妹數十篇如霜天雁叫雪夜梅開令人展卷一吟心骨俱冷厥後詩益工病益劇以竹濫絲哀之響爲鍼愁砭恨之方觸景生情一篇之中必三致意嗚呼幾何而不戕其生也向嘗謂造物忌才而所以厄巾幗才者尤酷或促其年或慳其遇甚者錦字成文藁砧寡和如懷才奇士不逢知己抑鬱終身遂令教女者以筆墨爲戒而深嫉之良可痛焉今女史雖不能年而雀屏選壻鸞鏡掄才十載同

心千秋雅韻天之所以厚女史者豈淺鮮哉畫卿哀逝
悼亡文數千言詩百十首名曰補琴吟草旣又哀女史
遺藁八卷拔其尤十之二手錄成帙徧質文人將壽之
梨棗微之齋莫不足比其周詳孫楚情文莫能逾其悽
感亦才人之深於情者女史有子一名昌沂幼慧甫三
齡已能讀母詩知此藁之留遺者益遠予與畫卿故親
串且同遊十餘載爲通家幸聞女史淑德清才卓然名
媛能道其詳今又與畫卿同客春明得閱女史全藁因
不揣固陋弁其簡端若以予爲知詩而論定之則敢謝
未逮咸豐癸丑暮春之初姻侍生何燦拜書於薇省直
廬之琴舫

綠雲山房詩草卷首

十

序

道光初僕與佩蓀同年待試春明各攄秋感聞其叔季之屢折賴有女弟之承娛述訓萬言灑金鑿而秉筆孔懷千里寄錦字而舒華迫歸翠媽之門從侍紫谿之學親分兩地離別多思庭事三朝和平善賦前此十年婉婉白藕之詠早傳洎乎九載糟糠黃絹之絲可集會以其稟質虛白老人與湘佩女史得嬪正始之選卓爲名媛之歸此陳室鏡香勞孺人綠雲山房詩草所由傳也方期青雲穩步借藁砧同上長安雪絮重賡省闈帶更稱言告乃亡何而鴛鴦之賦遽盡芍藥之頌空留愁疾難蠲萱蘇徒采然脂弄墨陳迹都非組藻簪花遺編未

綠雲山房詩草卷首

七

竟念大雷之三媚謝蕭郎而獨飛隨君山之二娥泣竹枝而成暈於是畫卿陳子裴橋短夢悵望明星須石長悲悽聽暮雨比小玉霏煙以後尙賸巾箱較夷光化土之餘流輝縹帙手鈔珍重稍報生平戒學之勤箴案蕭寥庶幾沒世貽芬之遠無慚雅韻惜早摧不蘓清才有裕徽音堪永譜若邪僊曲追妙祥於累葉使勞山因形管增光慰定武之連枝幸瓊笈與丹臺並壽云咸豐甲寅九秋滌甫宗稷辰拜序於方塢舟中

序

大羅天上金粟前身小謫人間曇華幻影斑隱霧豹爪
留雪鴻得誦芸編已欽藻範才人謝女進士劉孃鏡兆
夫容書嫺父訓龍山毓秀孕結珠明鵲漢催妝姿逾玉
潤冬雪絮詠春風桃夭離親梓鄉暫睽越嶠隨翁芹序
遠旅唐昌林禽畫眉替商深淺柳鶯弄舌互工唱酬鯉
謀晨餐螢佐宵讀藁砧團唱柳袍待霑豔福三生靈修
雙絕愛日隔蔭全家北征還雲爽期頻年西笑三千里
外十二時中烏私未償蝶化成讖魂離玦訣夢脫鞋諧
讀罷齊詩聽雞人隻寫倦唐韻彩鸞僊歸淚雨掩紅眉
月墜綠潘岳遺挂呼之不聞徐淑零縑檢之觸痛陳編

綠雲山房詩草卷首

三

在手勞人摧心鰥鰥忘眠蛩蛩乏遣徧按蓋篋粉臙脂
殘幸戢落牋綺交繡錯詞富壽棗奠勝設芻霞楮一揮

煙墨千古因君遺恨撥我前塵紫燕分久悽八詠前謂

室沈翠螺凜冷復斷雙聲繼嬾凌氏著有翠螺閣詩稟梓行並惜苕華

同辛薑桂時乎不再逝者如斯觸緒千條題牋一紙今
番兔管序愧不文他日雞林紙應增賈咸豐乙卯秋錢
唐丁丙書於塘棲舟次

序

浣紗谿畔桃泛春融落帽峯頭萸香秋冷桐君已去遊
迹常留梅尉不來隱栖宛在山水之秀閒鍾諸房幃風
月之謠遂播於篇什此綠雲詩稟所由著也想其幼嫻
姆訓長讀父書鬪草餘閒託絲竹以寫興繡花得暇借
楮墨以道情雲霞無以喻其華冰雪足以方其潔得鼎
鼐之真味氣清而體腴埽箏琶之繁音曲高者和寡斯
則嬌女之稱名傳里巷大家之號光奪門楹矣旣而乘
龍得婿駕鷁離鄉唐昌路遙越嶠夢隔舉孟光之校齊
翁與偕織若蘭之機同心永矢琴思詩思所宵唱酬書
聲杼聲風雨和答思兄遠道寄之楊柳之詞懷姊故閨

綠雲山房詩草卷首

三

寫以蘅蘭之體此又極閨中之樂事擅林下之高風也
而乃瓦鴛夢妖弓蛇幻影鸞鏡破月貌香化煙繡閣鶻
唳綠雲閃彩鍼樓鵲散紅雨罷妝讀鮑照之書黯然出
涕顧安仁之挂漕焉愴懷手稟一編徒付梨棗腸輪九
折空弔靡蕪吁其甚焉良可悲矣嘉也畫翁餘課閒事
效顰弄舌初諳有慚依樣捧瑤篇而三復未免胡蝶欺
人譜麗句以雙聲竊恐鴛鴦笑我徵諸近集同欽翠閣
之詞時方讀凌苾沉
夫人翠蝶閣稟贅以弁言殊愧玉臺之序咸豐五
年中秋節仁和女史子淑陳嘉頓首撰

序

憶庚戌歲余初因沈湘佩得見鏡香夫人詩喜其煙墨
呈曠斑毫蘊清如九天風濤疏鐘迴梵千巖晴雪飛花
撲琴竹柏挺以幽姿萑蘭孕其胎息卽集中所載詠古
諸作是也時夫人下世已三年矣此後秋蓬露飛波路
夢遠舊雨湖海烏馴之書不逢美人瀟湘碧雲之思彌
極今年冬讀其綠雲山房全詩始知小鸞之作不止數
章淑真所傳固有專集釵敲花以刻韻箋疊粉而珩香
澹思當秋修梧同其幽潔臨流而詠落花亦有歎聲蓋
其料雪瀚腸刈芳爲骨故能託迹騷雅發聲慘離也今
夫感深者語長柱高者絃急故藁砧山上唱斷刀頭梧

綠雲山房詩草卷首

古

子門前歌生輪角夫人以璇閨麗質無金錯謫愁詩書
澤夫睂翰瓔鬢造其福豔聯芳有集小妹亦解言詩大
雷一書阿兄且欲焚硯雖其後罵鳴灌木葛蔓平泉嫁
衣黃竹之箱親舍白雲之夢而彩鳳同棲女几紅鸞近
傍文星翠硯研花郎眞睂史絳紗問字妻是先生屏隔
夢以飄煙樓當山而畫翠往往張絃說月結縷穿星被
酒聞鶉烘愁畫蝶皆詩中語 瑀歛泥箋宜男則替卜榴房銀
管題秋隱謎則偷歌蓮子閒情詠燭麗唱酬釵夫亦異
曲同工雙煙一氣矣而夫人羅巾種淚珠斛蠶愁牽玉
虎而迴絲鬱翠蛾而增繭然蓮華之蓋有由難明參梅
子之禪酸心自領遂至殘絲蠶盡瘦骨龍飛敎病葉以

辭枝痛成蓮之傷藕留僊裙冷誰令蝶蠹驚飄續命絲
長不許蛾眉暫繫

集載端午胡蝶二詩絕筆

雖謂才難兼福抑亦憂

之傷人歟

錄

佳節思親可云同病爲人作嫁自笑無端

撫青鬢之蕭騷代紅顏以痛哭天寒翠竹念環佩而慨

然月落青楓問爺孃其憶否今者檀奴感逝元九營錢

鈔楮葉於從頭乞糶糶以導首摩尼出世望之人定知

奇竹素有情或者君能不死序成就寢落葉打門蒼葭

已霜淒萎如雨惜湘佩七千里外不能與共讀於西窗

燈火間也咸豐五年乙卯十月錢塘秋芙女士關鐸頓

首撰

綠雲山房詩草卷首

五

序

自內子倪扶亭之亡忽忽不樂者經歲欲檢所作詩以
付手民而遺篋中無一篇存焉存者花卉冊十餘葉彌
陀經一卷不忍觀仍棄之囊筆客鑑湖將藉越酒爲消
愁計不意於若耶谿畔忽遇傷心人也時方仲夏風酸
雨澀旅館蕭然散步至城南晤同年友陳君畫卿以手
鈔詩本見示爲其夫人勞鏡香女士遺橐詩境殊高無
粉奩脂盃氣序之者已備述其佳處余不復贅一言夫
紅燈影裏碧紗窗前置一工唱和者於其閒似造物亦
無所用其忌乃女子習刺繡往往不能文有一二能文
者又不使永其年斯人已矣其如與之唱和者何畫卿

綠雲山房詩草卷首

去

今日當亦曰若耶谿畔忽遇傷心人也咸豐丁巳五月
奉賢袁瓚序

序

勞鏡香女史子同年佩蓀司馬之季妹也前在京師卽耳其名蓋子繼室蔡令香善畫工詩嘗與沈湘佩諸女史往還得聞鏡香詩才歸輒爲予道之也歲乙卯子避難挈眷來浙僑寓嘉禾令香以疾下世丙辰夏子復由西湖遷越通家陳君畫卿時相過從始知鏡香乃其淑配畫卿固浙東知名士高才博學工吟詠隨父任之唐昌與鏡香十年唱和哀然成集名重一時無何鸞鏡方圓而鵲絃遽斷惜哉索其遺藁之選以待梓者如干首皆卓然可存子益奇之夫詩以道性情女史性至孝故集中多思親之什其他摠懷詠物諸作亦莊雅可誦以視世之裁紅刻翠徒詡纖穠奚翅香壤乃益歎向之名播京師者爲不虛也惜令香之沒已二年不及見此集耳子方恨天之奪子良匹不意畫卿亦同此感造物忌才如出一轍夫復何言感慨之餘爰誌數語於簡首而歸之咸豐丁巳孟秋潛川章瓊拜序於若耶旅邸

綠雲山房詩草卷首

七

序

余與又峯勞丈同出王文恪公門下值史館時居與勞丈近晨夕過從相得甚歡一日以南來家書見示悉出其季女鏡香手語甚雅馴並附詩章亦朗然可誦余竊竒之謂勞丈曰古人言生女勿悲所包者廣如鏡香者刺繡之餘吟詠不輟能得親心歡豈特爲門楣之喜歟勞丈輒然因道佳婿陳晝卿詩古文辭爲一邑冠閨房唱和疊韻聯吟可謂兩美必合矣轉瞬余出京言旋且十年勞丈已下世前事都弗記憶今年春遇晝卿於四明公廨出其夫人綠雲山房遺詩二卷則鏡香于歸後所作也託境清超賦物瀏亮閒詠史事見解尤高集中

綠雲山房詩草卷首

六

獨多思親懷遠之詩爲得風人性情之正天若假之歲月慮無不突過前人何圖豔福難消人琴易杳蓋鏡香之亡於今已十有五年矣晝卿固深於情者讀其悼亡諸作情文相生令人悽然增伉儷之重况賢而才如鏡香者宜其愛之慕之誦之思之惓惓弗忘十餘年如一日也嗟乎人生得一知己可以不恨求知已於風塵中固不易得求之於閨閣中尤不易得得之矣往往不永其年是豈天忌其才而故戾之耶或謂女子無才爲福才則多不壽不知無才而壽不如才而不壽才而不壽而有能壽其才者則其才自壽天生鏡香之才而又得晝卿爲之偶乃可以不壽矣然則天之所以戾鏡香者

卽其所以壽鏡香歟畫卿乞余言弁其簡端因述其大概如此咸豐辛酉中秋山陰謝榮埭方齋書於四明庠舍



綠雲山房詩草卷首

充

序

列傳作於中壘風詩肇於周南德言並崇文字閒采自
玉臺選富而滿篋者清詞錦字書傳而專家者絕唱於
是馨逸迭扇鉛華相耀家傳黃絹之辭人有金鑿之譽
近代以來厥風尤盛是編爲山陰勞鏡香女史所著計
古今體詩若干首緼瑟善調吐葩若繡埒難兄於賦茗
徵幼慧於詠絮雕繪盡致穠纖得中寫懷遠之情紆而
彌軫工言愁之什樂不解憂晝卿以哀逝而摛文因斷
腸以編集壽之梨棗鐫若茗華益信靈貺所鍾瓌姿代
出雙聲競奏一集斯專格本蓂花合令然脂替寫功成
刻楮勝留遺挂僅存同治甲子春正月吳縣馮桂芬敬

綠雲山房詩草卷首

三

亭并書於歇浦舟次

綠雲山房詩草卷上

山陰女史勞碧君鏡香

暮春

道光己丑十四齡作

冉冉春光去隄柳晴飄絮晝長人倦眠風定篆煙駐綠
蔭密如雲鶯噓不知處

斜月

十四齡作

紙窗寒月影初斜未必樓深一半遮好似天公珍筆墨
不將全幅寫梅花

繡餘吟

十四齡作

繡餘無事捲簾窠吹入飛花幾片紅小燕亦知春色到
一雙斜掠畫屏東

綠雲山房詩草卷上

初夏

十四齡作

春光老去日初永繡簾不捲東風靜殘香繞砌落紅多
芳草如茵飛絮冷雕梁燕語學剛圓碧樹鶯聲噓欲啞
叢蘭四座釀奇芬新竹一檐墮空影午倦拋書夢正酣
松濤飽耳瞿然醒亭外斜陽一抹紅起視月明弄清景

桐江舟次

戊戌

帆飽霜華冷不舒雲天何處認山居酒杯猶注家鄉水
桐江有越城東歸夢重牽阿母裾心事避人多強飯淚
浦酒沾得一甕
痕入硯正封書寒星朗月灘流急知是潮聲欲上初

初至唐昌作柳絮吟呈越中老母

君不見灞橋之上楊柳枝蕩搖飛絮含丰姿可憐三月

化萍梗正是垂楊頭白時臨流相送悄無語忍使萍花
自飛舞白門倚望空惘然淚灑千絲萬絲雨此花本是
楊枝生高飛低舞何輕盈夕陽芳樹東流水無柰春風
欲送行青眼依依識行路猶逐西風向東顧天生弱質
有所歸未許本根久依附祇宜歸處便爲家徒羨園中
千樹花花落猶在花開處飛絮茫茫天一涯看他漂泊
今何在近是比鄰遠絕塞回思去國夢魂中相思未了
三生債但得楊枝老未衰春風安穩護樓臺明年海燕
雙飛日銜取萍花枝上來

紙鷲

寄身欣在杏花天百尺游絲任轉旋借得東風雙翮健

綠雲山房詩草卷上

二

霎時飛上五雲邊

鐵馬

金勒無須響遠傳不關櫪下與郵前三更樓閣秋聲裏
祇許封姨快著鞭

夾竹桃

芳名應屬武陵家更擅凌雲品足誇湘浦天寒凝絳雪
渭川波煖簇丹霞影邀夜月書千个色傲秋霜殿百花
羨爾濃華偏耐久春闌開到菊含葩

春寒

己亥

瑣窗鶯喚夢初醒煮茗添香戶未扃紅雨簾蘖春片片
東風庭院晝冥冥氤氳花氣霏羅袖靉靄雲容上畫屏

光景依稀如鑑曲

幼時妝閣在臥龍山麓西望鑑湖

層嵐一色黛螺青

睡餘

睡餘伸紙學塗鴉風定鑪煙整不斜聽得侍兒爭報道

水晶簾畔落楊花

傷別

輕風如翦雨如塵無限春愁壓繡茵官舍荒涼鳴苦鳥

唐昌官舍居四山中多杜鵑夜啼

山樓幽邃鎖吟人鄉音渺渺剛三月

煙水茫茫隔二親多少世間惆悵事由來最是別離眞

暮春陰雨

餞別東風暮景幽連番煙雨暗西樓一天雲氣歸山腹

萬斛泉聲接堰頭芳草萋迷胡蝶夢落花零亂子規愁

綠雲山房詩草卷上

三

韶華幾日添濃綠槐蔭苔痕翠共流

春晚

夕陽紅半墜簾捲晚風開爲惜春歸去無心埽綠苔

夏日卽景

夕陽西去茜窗開招得涼風轉古槐聽到鳩聲穿屋角

遙峰雲罨雨將來

榴花

薰風披拂乍炎天開徧榴花豔欲然照眼烘成雲乙乙

含胎能化子千千俄驚火樹橫詩榻獨乘丹心上酒筵

爲有光明爭似日官教顏色買人憐

新秋

秋意林閒慘澹加
幾絲衰柳帶栖鴉
一村烏柏炊煙裏
露出茅檐三兩家

年年容易感西風
流水行云萬古同
昨夜庭前聞落葉
秋聲渾在雨聲中

離合年年說此宵
填河靈鵲也魂銷
天孫有巧人休乞
知是藍橋是斷橋

卜得佳期歲一過
莫因離合淚滂沱
古來四萬八千載
會比人閒百倍多

秋夜

綠雲山房詩草卷上

四

碧海三更月
銀河萬里天
松風寒捲雨
竹露澹流煙
酒渴思吞海
詩成欲傲僊
夜深涼不寐
門外一池蓮

秋月

春光送斷碧
谿頭幾日西風
又上樓
明月有情還顧我
怕人扶病不勝秋

再詠明月

明月是故人
千里度關津
明月是青色
千載濯冰雪
月有圓缺時
人有離別思
離別莫耿耿
人生一月影
月影來復來
人生去不回
百年一大別
何必長相憶
行樂不嫌狂
酬月千百觴

慟紉香大姊

東風未老墮燕支折我荆花第一枝料是肩隨還有日
倏然羽化竟何之魂歸繡閣春三月姊卒於母家夢斷征夫

淚幾絲姊夫客姑蘇未歸不道臨流相送日人間天上別離時

蓉來唐昌姊扁舟出郭相送

憶去年庚子

去年春水放湖船今日春來已隔年一夜東風眠柳地
連朝微雨釀花天鴛鴦嬾繡人遲起鸚鵡重編韻細研
只是光陰容易逝夕陽紅到暮山前

春日初霽

雨餘香點墮林坳漠漠春雲樹影交可是風光晴更好
柳隄鶯囀夕陽梢

綠雲山房詩草卷上

五

清閒畢竟是山家吟罷新詩數落花卻喜畫樓臨水際
湖光分綠上窗紗

偶成

閒庭微步又徘徊風判飛花點嫩苔簾畔忽聞鸚鵡語
曲闌干外有人來
端午卽景
蒲酒微香撲玉缸醉餘人倦倚紗窗疏簾欲約香煙住
偏誤飛來蝶一雙

雨添山色碧瓏玲庭院無花尙繫鈴坐到日斜風定後
藤梢扶影上圍屏

遠眺

山居清寂意常秋萬綠浮空擁一樓半爲吟詩閒不得
無心祇羨水中鷗

夏日寄懷

南屏山對廣文居古木陰濃綠到書碧玉闌邊揮白塵
紫藤花下飼紅魚半階月印鞋頭窄三徑風分鬢翼疏
簾捲鰕鬚凝暮靄林泉清絕夢何如

小窗幽蒨薄涼生高樹蟬鳴客夢驚暮雨樓臺雲乍斂
晚風簾幕月初明有懷骨肉心千里不盡羈愁漏五更
多病無須尋藥石且從閒裏快吟情

涼思

款步晚涼天烹茶汲石泉疏鐘搖獨寺斜日度平川地

綠雲山房詩草卷上

六

僻先忘暑神閒卽是僊輕風薄羅袖修竹倚娟娟

秋夜獨坐

滿地秋芸襲翠裙空庭夜色已平分三更冷露侵黃葉
萬里西風捲白雲蟲語不堪愁裏聽雁聲多自客中聞
碧天如洗涼無際添得鑪香一炷焚

憶別

追思舊日去妝臺不折楊枝折隴梅生怕高堂增別淚
臨歧那寫首輕回
滿懷惆悵寸心知對鏡難忘話別時歲月消磨鍼綫裏
囊中祇有百篇詩

午倦

碧窗閒暇倦依栖夢到龍山路轉迷迷路也曾天向午
竹籬深處一聲雞

聞南屏鐘天大雨霰

凍雲疊疊隱禪林霰墮空山漏欲沈萬點詩魂飛玉屑
一聲僊籟破塵心重添猩幕燈光瘦小試螺杯酒味深
莫道三更寒入夢有人呵筆尙聯吟

和晝卿聞鐘雨霰之作

深山寒墜一聲鐘喝破層霄幾日封十里凍雲連朔氣
三更梵響落危峰珠跳鳳尾頻喧竹玉點龍鱗半壓松
銀炬高烧人未寐遙灘惟聽水溶溶

雨雪並下閩中有作

綠雲山房詩草卷上

七

千條萬縷認模糊不夜瓊樓忽散珠人道天公工玉戲
有時還倩雨師扶

散徧階前又檻前水晶胡蝶亂絲穿笑他來去從流水
消得楊花我不憐

敲冰翦水雜銀沙滿地光明整復斜隔住垂垂簾一桁
瀟湘波影織梅花

小齋燈火夜三更雪本無聲轉有聲若得佳人還詠絮
雨絲都作柳絲輕

凍硯殘編頗耐寒鶴翎盤舞出林端天教山色千頭白
重翦銀雲護曉巒

者番寒意逼重茵爆竹聲中便報春今日紗窗人詠雪

明年都是詠花人

望積雪

嫩日初升雪未消
荒村野店盡瓊瑤
一林寂靜埋寒葉
三徑模糊滑斷橋
銀粟光搖江水闊
梅花香帶嶺雲飄
千重屏障移眞面
別樣玲瓏未易描

自題庚子年詩草後

容易光陰又一年
聯吟轉瞬已成編
一般詩思兼鄉思
半自燈前與酒前
漠漠春風花月夜
重重殘雪夕陽天
最憐學得雕蟲技
多被妝樓別緒牽

聽雨不寐

辛丑

連宵滯雨作愁波
浙瀝聲聞柰睡何
弱質祇嫌春夜短

綠雲山房詩草卷上

八

離懷常覺病時多
歸鄉夢斷三更漏
感舊詩成七字哦
自愧年來終碌碌
不堪花事又重過

卽景

晚妝重整倚銀匳
花露香濃染指尖
滿院綠酣無箇事
夕陽雙燕入風簾

晚風

簾捲晚風清行吟待月明
几窗良夜色筆墨可人情
小院餘花妥深山異鳥鳴
今宵眠不得爲怕夢魂驚

飛花

春去闌干日易斜
光風催起萬千花
飛來錯落成紅雨
舞罷零星作絳霞
欲墮芳塵還俯仰
且隨絮雪鬪清華

多情莫悵繁英盡水面文章自古誇

贈姚女史薇雲

誰識山中有左芬文章嬌倩似春雲愧予曾竊雕蟲技
一種僊心總讓君

新晴

霽色初添鏡檻西屏山飛翠落玻璃花含香露鶯喉滑
簾翦春寒燕羽齊遠浦雲收茅屋見前村谿漲小橋低
日來閒殺尋詩屐草長坳堂路漸迷

睡起

菅騰一覺日初斜半畝槐陰浸綠紗物態每從閒裏得
蜻蜓飛上紫藤花

綠雲山房詩草卷上

九

夜起

一燈半明滅寒蟲咽四壁門外何蕭蕭西風下黃葉

病肝偶遣

促織寒聲四壁催紙窗風細燭成灰自憐顛頓秋來甚
夜展菱花照鏡回
不整晨妝整午妝腰肢寬褪舊衣裳藥鑪茶臼消閒外
小字書愁紙一方

秋景迴文

楓林一抹澹霞紅
夢破涼秋九月風
鴻渚寄書傳遠塞
隼臯飛翠刷晴虹
濃香晚菊探階下
冷豔疏葭看泚中
蓉出水如僊句好
影搖燈壁陋吟蟲

疊前韻又得一首

楓岸看花爲葉紅，露零疏樹逗寒風。
鴻泥印月涵清渚，雁隊排雲隔斷虹。
濃聚雪濤翻水曲，薄鋪霜彩散庭中。
蓉塘夜色涼深淺，永漏驚殘更語蟲。

是歲六月下澣生子不育戀枕月餘起而得長句一首

門掩秋光盡日眠，綠雲吟草久拋捐。
西風燈影寒牀畔，暮雨蟲聲答枕邊。
秀種芝蘭偏易槁，香消荳蔻恨無緣。
而今合詠歸甯句，擬放長江九月船。

時正擬冬間返越

中元

千重煙翠暮山陰，遠寺疏鐘響易沈。
曲檻露寒渾不覺，

綠雲山房詩草卷上

十

低頭猶學鳥僊吟

夜起偶拈

蛙聲一何急，蟲聲復唧唧。
秋色幾分涼，閒數梧桐葉。

梧桐一葉飛，梧子忽然墮。

七月炳兒墜

深院悄無人，輕風動

連瑣

閒遣

斷雲如帶束山腰，採藥人過迹未消。
石鏡空懸螺黛失，西風顛顚倩人描。

詠雪

無端花雨壓紅塵，飛入梅叢認不真。
最是天公能破寂，

教人先見玉堂春。

須臾琢就玉乾坤山影天光一色渾惟有園林消不得
安排淨土葬梅魂

曲闌干外界玻璃遠近峯巒一翦齊遮莫前身是明月
謫來猶傍白雲栖

病懷寄瓣香二姊

病裏逢春事事乖怕看新綠長沿街離愁未了詩千首
衷曲難傳天一涯倚枕有情偏畏夢啟匳無緒不勝釵
雲山重疊家山遠坐對寒燈動客懷

山窗岑寂露微茫瘦質慳慳倦卸妝夜靜不眠勤琢句
春寒多病健思鄉花添別浦鶉聲苦風涌神瀧雨勢狂
物籟何堪愁裏聽擁衾無柰漏偏長

綠雲山房詩草卷上

十一

平安二字問東風百結愁腸一紙中衣綫有懷雙鬢白
唾壺餘淚隔年紅門前倚望人何遠雲際團圓月自同
惆悵身無飛鳳翼惟將離緒託賓鴻

附瓣香和詩

屢約歸期信屢乖一年春事了香街喜從蘭訊通芳
訊悵隔天涯又水涯風送花鈴思玉佩夢隨妝閣撥
金釵何時衣錦重相敘兩訴離愁兩慰懷

茜紗窗外月微茫遙想伊人整晚妝三月春寒宜著
意五更清夢儘歸鄉齊麋好自勤梁案歌鳳何妨學
楚狂蹤迹日疏心日戀臨風悵望引愁長

連日芳菲度信風懷人情緒不言中好將筆墨醫新

恙莫倚闌干看落紅萱草欣榮差足慰荆花開謝已
難同且教白雪依聲和聊報平安寄遠鴻

答外

雪消山院月華遲何處歌傳笛一枝如此良宵無與伴
強人扶病又成詩

寒思

寒風吹我衣寒氣襲我體雲霧厚於絲衾枕涼如洗
日暮見歸鴉山中感遊子如何人有懷不及書中紙

楊柳 壬寅

三月春從柳上歸沿隄一碧隱漁磯低頭慣學東風舞
轉眼還憐暮雨飛簷黛有情空脈脈腰肢無賴故依依

綠雲山房詩草卷上

三

那堪晴絮飄如雪卻讓梅花結子肥

數擬歸省不果睹夕陽有感

夕陽紅到柳梢頭何處歌傳故國愁歸計于今憑尺素
相思勞我輒三秋環城空有桃花水喚渡難登竹葉舟
剛擬回檣逢海燹 夷擾雨東
道路阻滯 夢魂常繞面山樓 故園
妝閣

春晚

乍出簾窠去無端斂袖歸不堪花滿地庭院又斜暉
閉戶寒疑雨推窗春正晴愛從山裏住那得避鶉聲

卽事

風鳴鈴索夢回天一枕鄉愁訴未全聽得庭前小兒女
綠楊陰裏蹴秋千

倚闌無力洗燕支異地經春不自知長日如年深院靜
夕陽鶯夢熟花枝

聽雨不寐

山中一夜雨冥冥官舍清冷戶未扃竹院雲深疑坼甲
蕉窗風急似敲丁涼生繡幌醒詩夢光黯蘭膏冷畫屏
底事思多眠轉少更闌猶自擁衾聽

竹簟

一覺清湘夢迴文八尺寬波瀾驚帳底風雨憶江干晝
靜鸞笙倚眠遲翠袖寒待看炎熱退冰玉露華溥

筠簾

碧窗涼似水波影落雕檐解取龍孫籜垂爲燕子簾細

綠雲山房詩草卷上

三

風銀押重初月玉鉤纖手捲霜皮滑殘香縷縷黏

藤牀

木榻今無用新編剝曲藤蠟光融四角肌理印雙層坐
下風如織移來水有稜不須鋪龕席沈醉已難勝

櫻拂

那怕飛蠅集枿欄一握新紵衫清不滓髮几滑無塵顛
有山林意最宜高潔人芒鞋還共製樸野見天真

羽扇

漫裁紈作扇卻借羽爲儀障日炎威少搏風勁翮疑道
遙陪鶴擎塵俗笑龍皮入手同揮塵談元晷影移

瓷枕

頭腦冬烘憤支頤覓古窯涼痕浮水簞粉地壓冰綃匣
劍星文動鑪香篆炷消夢尋洲島去應有羽人招

草笠

涼暈隨身到驕陽立地分軟檐垂蝶翅圓頂繞螺紋裊
裊吹雙帶團團織片雲不愁風落帽林隙又斜曛

葛衫

幾度勞纖指漚麻向碧潯竹闌晨拭露桐院夕披襟著
體痕猶薄含風暑不侵井華重澣處雪色映秋砧

秋日閒眺

萬山濃豔著丹楓人似黃花瘦瘳風刀尺寒催蟲語老
別離情與雁聲同一千里色秋剛半十二樓頭月正中

綠雲山房詩草卷上

古

此際何堪煩寓目故鄉遙指海雲東

夜話

滴雪空階月二更天教雪月淨聰明青燈一點人無賴
半欲吟詩半未成

聽殘長漏罷敲碁窗閉銀缸坐恰宜漫道夜寒山徑寂

一雙馴鶴下疏籬

杜鵑 癸卯

九十韶華暮天涯泣杜鵑淒清明月下幽咽綠窗前苦
口空嘸血相思欲化煙東風不解恨來去自年年

白荷華

生從水國淨無塵不羨羣芳鬪豔新碧沼頓開銀世界

清波徐滌玉精神
露寒綈袂歸湘女
風動霓裳舞大眞
一片冰心誰領畧
本來明月是前身

能教一水化藍田
種出瓊枝質倍妍
擬倩高人聯白社
故將雅號附青蓮
開從玉井顏如雪
修到梅花骨也僊
看得扁舟歸去後
鷺鷥飛破夕陽煙

用成句

瓣香二姉自越惠書詩以報之

天涯同是善懷人
聚散悲歡老此身
兩度裁量歸省計
五年消受別離春
楊花曲裏心如訴
杜宇聲中夢未眞
料得琅琊風月夜
銀壺煖酒奉慈親

屢卜歸期未有期
幾經花落柳垂絲
徒增別淚翻疑夢
每寫家書輒寄詩
愧我思親空悵悵
多君將母善扶持

綠雲山房詩草卷上

五

果然畫荻能垂範
喜見驕兒上學時

姊有子四齡

送瓣香二姉隨老母北上

驪歌傳恨到妝樓
兩地同懷去國愁
一雁又隨雲北向
雙谿還逐夢東流
燕山好訪金臺古
越樹空涵鏡水秋
休悵長江千里隔
相思遙送海西頭

月

悲歡離合人閒人
陰晴圓缺天上月
奈何千古有吳剛
不修明月長無缺

寄宗浣芳女史

滌樓侍御之女適王若農

詠絮才名日下聞

由京師瓣香姊寄詩山中

紅閨良友隔湘雲
龍山

九曲懷鄉里家學淵源不讓君

九曲巷在龍山北君幼所居

柳陌封侯夢未闌
一新詩壘上吟壇
遙憐夫婿頭銜貴
笑倩燕支畫牡丹

若農隨父珠樵先生官湘中

奉答吳興沈湘佩女史正始集選詩之約

萬派長瀛集眾流
雕蟲何幸識荊州
紅箋寫韻吾私淑
從古吳興八詠樓

廣陵遺散伯牙琴
二百年來正始音
大雅扶輪歸不櫛
手持玉尺度金鍼

莫愁湖

萬頃晴波一望收
名花落去水東流
莫愁湖被愁人住
不許他人到此愁

鴛鴦湖

綠雲山房詩草卷上

去

錦浪微波似畫圖
年年春思滿菰蒲
高入也有雙飛羨
不住蓬萊住此湖

一片空明暑氣收
蒼茫煙雨水邊樓
天然寫出鴛鴦譜
開到蓮花也並頭

楊妃

天然麗質竟傾城
浴罷華清鬢小橫
一曲霓裳僊子樂
三章芍藥美人情
蛾眉已斷軍中夢
釵股空餘月下盟
誰謂雙星能作主
長生殿上果長生

明妃

白草黃沙路幾千
未央春色憶當年
思君淚溼關西月
去國魂飛塞北煙
玉骨銷磨寒夜笛
花容顛賴朔風天

至今雲際哀鳴雁猶是琵琶怨恨傳

燕子樓

寶劍光銷誓柏舟十年心事一危樓
臨邛市上雙飛燕應笑文君怨白頭

淮陰侯

壯士胸藏百萬兵釣絲垂餌蟄龍驚
窮途一飯尋常事留得千秋漂母名

決勝功同帝者師道旁一掾困鷗飢
市人胯下僇人履想見英雄忍辱時

銅雀硯

橫槊臨江儘賦詩可憐一炬竟難支
荒臺賸有鴛鴦瓦

綠雲山房詩草卷上

七

留寫當年絕妙辭

高臺寒鎖暮雲多百戰江山賸幾何
莫向西陵怨風雨祇今片瓦被人磨

西施

傾國傾城報越王沼吳功就去倉皇
何人空逐胥潮怒不及西湖照澹妝

樓臺歌舞甲姑蘇惆悵扁舟竟五湖
不是良金難共寫畫中無此美人圖

月夜玩雪與畫卿聯句

月滿空階雪未消畫庭柯寒削水晶條
塵揩山面明虛幌鏡石凍谿脣滑斷橋一片琉璃沈碧落畫九天珠玉

下丹霄高低夜色渾如畫鏡萬里清光是白描畫

早春登尊經閣眺望

甲辰

一家憑眺擬蓬萊碧瓦朱闌面面開共說文章藏二酉
須知吟嘯近三台窗迎紅日天容闊梯倚青雲紫氣來
不折梅花歸不得故抄芳徑踏莓苔

折梅

幾回灞岸策驢頻贏得江南一捻春冷豔著衣雲在手
寒香入袖蝶隨人分從庾嶺猶凝雪乞自孤山更出塵
不是路旁逢驛使隴頭何處報芳辰

簪梅

記取低枝上畫樓無端香惹鬢雲浮春光半面鬢痕薄

綠雲山房詩草卷上

六

雪意三分鏡彩收兒女容顏徒粉黛神僊裝束本清幽
可能降格從紅杏插向烏紗報狀頭

望梅

何處春生望眼賒小紅樓外一枝斜冰姿映水疑晴雪
素質當空誤落霞簾卷東風香入座窗迎涼月影籠紗
天寒底事憑闌久強半句留爲此花

吟梅

江南江北唱模糊人在花前俗慮無綺袂臨風香入夢
靚妝凝月句催吾寒雲一段詩魂瘦春雪三分賦格隳
任爾心腸如鐵石也應撚斷數莖鬢

佩兄寄高麗箋賦答

一幅雲箋出 帝州繭絲如織髮痕稠阿兄道我登高
望借此添修五鳳樓

寫意

閒愁別緒一身兼風送飛花入繡簾春草綠波誰畫舫
夜窗紅燭半牙籤家鄉緣薄心偏熱骨肉情多恨轉添
一事勝人聊自壯同懷詩稟尙盈匳

送娣婦陶畹香自唐昌之越歸甯

歸甯欣在百花前試放青谿二月船一幅蒲帆挂明月
桐江宵渡不須眠

征懷直指越王都不泛西湖泛鑑湖春水漪裙防路滑
上船端合倩郎扶

綠雲山房詩草卷上

九

有時小泊賀家灣夾岸花枝豔欲攀最是蓬窗臨鏡水
卻教眉黛學遙山

等閒重上舊妝樓八百湖山眼底收說與璇閨諸姊妹
故鄉春似異鄉不

好將定省事重敦喜見庭闈笑語溫無柰唐昌孤舊雨
梨雲深處閉閒門

目送歸帆水一渠吟朋回首惜離居三春花事君忙否
可有工夫作報書

落花

春深紅雨墮芳菲徧地殘香夕照微拌與階前風共舞
怕隨枝上葉同肥東皇別淚從今下倩女離魂逐隊飛

蝶影娟翻休自得祇防新綠不堪依

寄呈都中父兄二首

別恨重添二月春夢中常作北來人
長安此去三千里
吳越翻同隔比鄰

宦海風帆各自遊渺然天地泊沙鷗
君恩未許官同土

難免音書滯一州

兄官定州將
自京之任

憶龍山故居

俯小琅瑯塔影斜

故居俯飛來峯亦曰小琅瑯上有清涼寺塔

山樓空贖舊

煙霞可憐曉起催妝鳥猶認窗西鐵樹花

春日寫懷

飛花時節困人天小雨空濛柳半眠
惟有新篁初解籜

綠雲山房詩草卷上

三

橫書个字落屏前

春事闌珊過眼賒將飛花是昨開
花羣芳也厭蜂聲雜

乞取廉纖散午衙

夢回詩榻瑣窗明綠樹含煙蔭
未成蓄意留春春不住

朝來春在賣花聲

記得山陰上巳辰紙鳶風裏幾吟人

謂初香瓣香兩姊

舊時門

第今王謝

舊居已易雨姓

誰向樓頭望望秦

望秦山在越城南

春望與晝卿聯句

南屏山北武隆西

晝暖浪如油漲碧谿十里嘯鶯深柳

岸

鏡

萬家春樹夕陽隄煙波蘸雨黏天綠

晝樓閣連雲

賸水低一片花光迷去馬

鏡

芳郊無處不成蹊

晝

寄陶晚香

一別兼旬景物殊東風如翦雨如珠去時開徧牆頭杏
幾日添來綠意腴

山中好鳥自呼名無柰牀頭客夢驚最是三竿朝日上
賣花聲裏兩嗁鶯

一幅紅梅共雪消

春正於積雪地
畫梅各有題詠

清明時節煖飭簫柳

枝也解人離別輕蹙眉痕澹不描

撩人情緒是韶華滿地殘紅不埽花著意憐春雙燕子
日銜風片到儂家

連日溟濛不見山山容新洗綠雲鬢爲看霽月當風坐
忍著春寒戶未關

綠雲山房詩草卷上

三

料得閨中韻事餘聯牀笑語興偏嘉妝樓吟伴如相問
報道寒山已落花

勸君多上越王臺暢飲鵝黃酒百杯珍重春光容易逝
紫櫻桃熟會重來

來時遮莫抱離愁重上青谿一葉舟郎自臨流送迎汝
芹香消息到紅樓

南屏春眺

南屏山在昌
化縣治南

春朝閒眺幾人同居近南屏梵宇東花鳴香風盤馬足
柳陰斜日漏漁篷一簾晴捲谿光碧萬樹高攢塔影紅
看到晚來山更好此身原在綠雲中

春日雜詠

半篙鳴漲盪輕橈春滿天涯客興饒紅瘦宮花鶯夢淺
綠肥原草馬蹏驕遊人心事忙三月名士風流賸六橋
最是垂楊隄十里夕陽牛背一聲簫

偶成

東風狼籍墮花魂辜負筵前綠螳尊底事憐香情轉怯
滿庭紅雨不開門

臨邛沽酒

蒲萄香煖喚餞天一角青帘霽色妍風味半酣紅杏雨
春光難買綠楊煙琴心宛轉聯佳偶花意殷勤侑綺筵
小挈神僊商翹雙題橋浩志逞他年

桃葉渡江

綠雲山房詩草卷上

三

送迎一曲大江濱萬疊情波黯澹春愁漬青衫風判袖
淚盈團扇雨霑巾夕陽芳樹今嗁鳥流水桃花彼美人
千古相思誰解釋祇餘明月證前因

寄呈都中父母二首

七載常疏問視身誰知故國半荆榛庭闈北望將逾歲
老母以去骨肉南留得幾人孺慕心懸千里月別離腸
斷去年春唐昌城郭燕臺樹翻覺龍山似比鄰

寂寂深閨落照昏嫁箱衣綫迹猶溫重關不隔思親夢
兩地同銷去國魂客路鶯花迎馬埒帝城風雨近龍
門焚香上祝春秋健指顧飛來鳳詔恩

桂花

一枝清豔色偏真，開向秋風別有春。
太古僊根依月窟，是誰移植到紅塵。

中秋

銀鈿吐燄薄窗紗，吹落天香何處花。
風動閒階翻樹影，一庭涼露噤栖鴉。

雨霽雲開彩滿天，扶頭酒解落花鈿。
可知今夜長安月，恰與唐昌一搦圓。

寶鴨香消夜半時，良宵獨坐未成詩。
開簾還向嫦娥祝，

要乞秋花第一枝。
是歲恩科鄉試

洗盡微雲玉宇清，蒼苔露重滑蟲聲。
闌干倚徧休輕睡，消受澂輝到五更。

綠雲山房詩草卷上

三

雁

萬里雲程任意遊，蘆花深處儘句留。
飛鳴爭趁關山月，來去能知天地秋。
古篆大書凌碧漢，斜陽疏點落寒洲。
不教雙足傳邊信，誰識蘇卿已白頭。

秋夜有感

桐蔭迷離月乍回，秋宵無侶獨徘徊。
篆煙散盡留空迹，催得鄉心寸寸灰。

雪滌塵懷悄不勝，疏簾長簾露華凝。
一年岑寂秋爲最，黃葉西風怯夜燈。

蟋蟀

弄月吟風寄此生，應時故故作寒聲。
笑他終夜催刀尺，

那得人閒嬾婦驚

病中口占

雨聲寒逗碧玲瓏切切蟲吟落葉中難得鄉心同病減
教人顚顚臥西風

卽景與畫卿聯句

萬里秋心皓魄中畫吟闌燈閃一窗紅犬聲寒徹藤蘿

月鏡蟲語涼生薜荔風簾約霜華留篆細畫樓迎泉籟

滌塵空黃花似怕人顚顚鏡特向東籬鬧一叢畫

促織娘分韻限霞字

獨傳幽韻到窗紗不是涼催嬾婦家爲報天孫勤組織

要人花樣學雲霞

綠雲山房詩草卷上

十四

寒鴉分韻限龍字

日暮衝寒嶺幾重羣聲嘹亮報初冬有時栖入松林雪
一片烏雲護玉龍

晚香女史遺桂花球

十斛天香一縷收綴來金粟儼成球可人慣作鴛鴦譜
巧簇秋花也並頭

晚香女史遺安息香

頒到名香手自焚牙籤疑入百花薰蝦簾一桁垂垂下
珍重輕煙鎖綠雲

玉簪花不開時似之

緘口無言情信芳瓦盆秋老玉生香天然潔白成釵股

抽得一枝添曉妝

木筆花

豔絕江郎筆一枝條條垂穎滌冰池含香留待朱衣執
不借人閒去畫眉

古意

喜與梅花說太虛遠峯雲影曳輕裾閒尋怪石安丹竈
擬傍清谿結草廬放眼古今天地小會心山水利名疏
塵襟滌盡惟風月賴有莊生老子書

雜感之一

萬重蒼翠望中收如駛年華去莫留半偈喚醒塵世夢
滿懷傾吐海潮秋無根淚灑花前雨不繫心懸瀨上舟

綠雲山房詩草卷上

圭

千古征人怨離別夕陽西去水東流

述夢

寂寂復寂寂夢境去來疾頃涉三千里不覺關山黑飄
飄入庭闈怕怕語相接門外藤蘿紅窗前柳條碧諸阮
猶垂髻二老髮增白七載依戀思一訴糸時日天雞喔
喔鳴瞿然秋燈側鄭人埋野鹿莊生化胡蝶此境本人
閒急追杳無迹悔我向夢中多費一回別攬衣起徘徊
梅花印殘月

松風

冬嶺風高撼古松時聞清籟下層峯疑濤疑雨渾難辨

萬仞寒雲吟老龍

竹雨

一徑新篁雨後看
洗殘輕粉暮雲寒
千枝萬个翠煙暝
江土湘妃淚未乾

綠雲山房自題

闈訓何如庭訓多
櫻桃花下學吟哦
生平不染鉛華氣
鏡檻詩成嬾畫蛾

每憑筠管寫鄉思
不許庸人局外知
鍼綫依然供婦職
偷吟多向日斜時

安排筆硯小窗幽
借此聊刪異地愁
詩句半歸梨棗去
任他衰貶定千秋

佩蓀兄由定州來函索予詩入國朝正始集之選

冬日閨中頗饒吟興得長句一首

綠雲山房詩草卷上

三

千巖積雪影連天
風景依稀又隔年
翡翠屏開延嫩日
鴛鴦瓦合逗寒煙
烹茶小品旗槍譜
駐篆閒談文字禪
何物清臞堪入畫
甫窗梅印一枝先

感懷

英雄何必皆逢時
陡然遇合猶嫌遲
凡鳥紛紛占芳樹
鳳凰安得梧桐枝
自撒茅廬近紅日
曩時花草休回憶
君不見春雷一聲
天地驚么膺瑟縮
莫敢出

詠月

皎潔無雲瀉碧天
聖琉璃界鏡長懸
哉生悟到迴輪法
不死方留擣藥僊
待我吟成詩十萬
願伊添住歲三千
人閒離合能知否
聽得磻聲影倍圓

戲成釀雪詞

寒鎖長空雪意傳
凍雲凝近界三千
饒他一夜北風裏
譜出梅花欲醉天

日薄空山朔氣深
分明畫臺似山陰
何人領畧寒中趣
風味應同灞岸尋

山川潑墨樹杈柯
寒結壺中欲作花
天巧也能商翹槩
釀成三白與人家

灰飛葭管野雲黃
正是僊人作醞忙
萬斛梨花傾甕後
不知酸醅倩誰嘗

玉鉤斜

路轉雷塘水漸灣
江都西去弔僊鬟
香泥一甕埋纖骨

綠雲山房詩草卷上

七

衰柳千絲墮翠環
石獸迷雲尋古碣
玉魚和月窆荒山
芳魂不盡宮中怨
化作鵲唳淚尙潸

螢苑

錦帆宮扇冷斜曛
萬點明星月二分
自昔同遊歌舞夜
至今還照帝王墳
名花夢斷雞臺雨
腐草秋寒鳳輦雲
燐火尙知前代恨
年年飛弔總成羣

雪花

別傳花信凍雲根
難得僊葩送到門
飛處直當三尺計
開時何與一陽恩
添來耐萼惟鴻爪
招得馨香是蝶魂
終古難逢春不夜
特留清豔鬧黃昏

霜花

破曉開成刺面風，卻憐青女翦裁工。
冷含蘆岸三分白，春借楓江萬樹紅。
吟入板橋人迹瘦，夢回畫角戍樓空。
天花那有迎朝日，看取餘芳在釣篷。

綠雲山房詩草卷上

綠雲山房詩草卷上

三

綠雲山房詩草卷上

天游暇有暇時日香姐繪畫在後

香雨歷丘萬樹球似人新謝人

新謝人似人新謝人似人新謝人





5
1
3